

元豐類稿

四十三之五


誌銘

			一一七	漢書門
		一一三	二七	類
	一一二	架	函	
	一七	冊	號	

內閣文庫			
三二五	一一七	漢	
函	二七	書	
一四	一七	冊	
架	號	類	

內閣文庫			
番號	漢	11727	
冊數		17(15)
函號		315	70





南豐先生元豐類稿卷之四十二


淺草文庫

南豐後學邵廉校刊

誌銘

都官員外郎胥君墓誌銘

君姓胥氏諱元衡字平叔長沙人皇考諱某王考諱某考諱某王考贈尚書工部郎中考為翰林學士尚書工部郎中贈尚書吏部侍郎君少以蔭為將作監主簿六遷為殿中丞賜緋魚袋鎖廳應進士舉得出身又三遷為尚書都官員外郎歷監在京染院內衣庫皮角庫簽書河南府判官公事通判湖州又通判



海州治平三年四月壬寅以疾卒於泗州其年八月
庚寅葬於許州陽翟縣三封原翰林君之瑩初娶李
氏太子少傅若谷之女再娶韓氏封成安縣君尚書
刑部員外郎知制誥綜之女子男二人曰茂諶太廟
室長次尚幼女二人長早夭君少孤能自奮厲力學
問工為文章又謹畏廉潔慕善而不自放居官雖小
法未嘗不慎而不為察察於人有所能容其大意如
此故所至士大夫愛其脩而百姓歸其恕其在染院
二庫雖尚少已有能名及為通判判官而能益顯蓋
所試者大將豈可勝數哉始大臣薦其文章宜在館

閣近臣又薦其脩潔宜任御史朝廷方嚮用之以為
江西轉運判官命始下而君蓋已死矣死時年二十
有九聞其喪者識與不識皆哀之蓋天聖之間翰林
君方屢顯好收獎天下之士而名能知人士之出於
其時有盛名於天下者多翰林君發之及其後君既
壯大所與遊士大夫亦皆一時之雋然自天聖至于
今纔四十年翰林君之門下士多至大官富貴尊寵
君所與遊士大夫亦多重於時而翰林君弃賓客已
久君又蚤世獨翰林君之夫人建康郡太君田氏年
七十與君之孥羈旅於閭巷君之喪合衆人之賻乃

克葬其盛衰之際如此固所謂命者非耶君之葬祕閣校理裴煜以茂謀之䟽來請銘予與君皆嘉祐二年進士故不得辭銘曰

維艱而勤以敏其繼維平而畏以篤其義考已無遺在人有賜我志之良孰曰非遂我材之亢孰曰非試不申其期不擴其施有命則然其又何悲尚告後世知者之辭

劉伯聲墓誌銘

慶曆之間余家撫州州掾張文叔與其內弟劉伯聲從予遊余與伯聲皆罕與人接得顓意以學問磨礪

浸灌為事居三年廼別後數年余以貧而仕見伯聲於京師年益壯學日以益又數年余校書史館伯聲數過余飲酒談笑道舊故相樂也伯聲未老然以疾故亦衰矣既而余去京師而東更七州至于亳伯聲子之美來告曰伯聲死八年矣將死時命之美屬余銘其言曰葬而不得余銘如不葬也余惟伯聲始從余遊至今三十年見其少壯至於有疾而衰與之故最久於其死而托銘於余故不得而辭也伯聲諱震為人質厚沉深寡言笑恂恂蹈規矩與人遊見其一善若恐不能及見其一失若恐不能拔其薦於誼如

南豐先生集 卷之三 三
此讀書有大志慨然欲有為者也少孤能自立尤貧
然營䟽屬之葬孤姪之嫁娶忘其力之不足也數以
進士薦於鄉卒不合晚乃得試將作監主簿曾大父
澤左補闕贈吏部尚書大父居仁單州單父縣主簿
考紘濟州司理參軍其先清河人自吏部葬開封府
之東明今為東明人伯聲卒於熙寧五年二月戊戌
年五十有三葬於東明之陽山鄉白駒里以元豐三
年十一月某甲子妻賈氏尚書比部員外郎式之女
子四人之美之純之奇之邵二女嫁倪良器李日新
張文叔名彥博余為之叙其文者也銘曰

敏於求已尚行寡言篤於求古廣見多聞有既畀之
而施則也維舊則信以諗後人

尚書比部員外郎李君墓誌銘

康定初先人寓南康與李君居並舍是時君年未四
十游余父子間相好也後十餘歲君為臨安遇余於
浙西道舊故喜甚又十餘歲君已退而家居復見之
山陽又九歲而君年七十有一以卒明年其孤仲熊
自山陽祗京師拜且泣曰願得銘也余惟君游余父
子間四十年矣銘其可辭君姓李氏諱丕字子京初
名真卿曾大父諱某大父諱某考諱某贈光祿卿母

丁氏仙源縣太君繼母王氏仁壽縣太君海州胸山人家故寒也學為士自君始出舉進士中其科得主楚之淮陰簿歲凶轉運使調軍食用君主宿州糴他州皆強賦民猶不足君隨便開誘糴者悅趨糴最他州去為虔州司法參軍能隨用見聲出衆上薦者十四人不用遷寧國軍節度掌書記轉運使屬君市翎毛優致如主糴所市以赤數之至十萬復最他州又屬君主作院君考校程度所作兵器總一萬一千三百二十有四皆精且利他軍州事有不能決者多屬君君所決者三十有八事蓋復太平州囚管壽活之明

通判歙州林瑀無罪釋之類如此於是能益白薦者十三人遷秘書著作佐郎用薦者監興元府稅急吏寬商課贏十有七萬歲中以歲次遷秘書丞以課遷太常博士以覃恩遷尚書屯田員外郎知杭州臨安縣召為審刑院詳議官賜緋衣銀魚遷尚書都官員外郎通判蜀州蜀少事然他州訟有積歲不能決者轉運使以屬君君所決八事民信服之遷尚書職方員外郎監在京內衣庫樞密使田况奏用君刪定馬軍司條貫既成詔加賞賚濱州有獄久不能決辭連大臣家子遣吏治之輒辭詔遣君乃決累遷尚書職

方郎中以母老出通判杭州坐法免復為尚書比部郎中監沂州承縣鹽酒稅未逾月自罷歸又監陝州集津榷鹽務不行以本官致仕元豐三年九月己卯以疾卒山陽之私第十一月甲寅葬安樂之揚興里君娶葛氏仙居縣君再娶喬氏壽安縣君子男七人曰仲熊衛州軍事推官曰仲謨以進士再試禮部曰仲將曰仲傑曰仲倩曰仲昌皆未仕也女六人嫁吳好禮于銳皆奉議郎馬察于鏗皆進士餘幼也君既自奮拔立其家蓋仕四方惟蜀去其親其事兄撫孫弟姪皆盡恩意其為吏不獨能自任其官蓋他吏之

不能任其事者或厲君兼任之辨且裕也不幸一跌世無力振達之者故以坎壈終銘曰

海區氏李有啓厥世富辭與能自約而侈曰父與子郎官卿士曰妻及母翟衣象揄謂勢方利孰輻以毀施不盡有故也則喟尚佑爾裔以追厥始

司封員外郎蔡公墓誌銘

公諱充字公度天聖二年進士及第為邵武軍之邵武尉又為應天府之下邑尉丁母夫人河間縣太君周氏憂服除為越州司理參軍天平軍節度掌書記遷祕書省著作佐郎知洪州奉新縣祕書丞知遂州

南豐縣志 卷之三 七
小溪縣改通判戎州累遷太常博士尚書屯田度支
司封員外郎歷監在京都進奏院群牧判官知絳州
又為提點荆湖北路刑獄公事至和三年七月二十
三日以疾卒於澧州之官舍享年七十有一嘉祐二
年十一月十三日葬于建昌軍南城縣太平鄉之西
原公為人好自潔清平居衣冠容貌肅然及其臨事
以沉默慎靜為主故自起家至於終凡三十餘年
歷內外官任事無纖芥之失其與人遊始若淡然無
足動其意者及其久人人皆退自喜謂公真長者也
其為尉參軍掌書記人始以廉節知公及為奉新小

溪絳州其政又以平恕不擾聞至其在群牧荆湖數
更置諸事人皆服其能其於越州屬將佐交惡府中
多向背公獨挺立無所與後將又以貪坐法官屬多
不能自全事亦卒無汙公者於戎州屬瀘州叛蠻攻
涪井監轉運使用公調兵食禦之兵遂以濟於絳州
州歲市羊數萬供京師公奏減之至今賴其法於荆
湖既周知官屬善惡於善人多薦籍成就之而於惡
人無所貸其法公既能自章顯其材故薦公者尤多
蓋王沂公曾王鄧公詒未與今富丞相弼之居鄆也
皆薦之而鄧公之為樞密使兼群牧制置使也又奏

公為判官其為當世之大臣所知如此初公年十三喪父家貧尤自克苦養其母及仕未嘗廣田宅喪歸借屋以居曾祖諱恭祖諱道隆父諱旦以公恩贈尚書屯田員外郎世家南城故為南城人娶鄭氏累封宋城縣君子八人曰冠卿祕書省著作佐郎曰端卿鄭州原武尉曰文卿曰徽卿曰宋卿曰喬卿曰子卿曰孺卿公歿詔官其一子蓋公不獨能以其有施於身又能力以其餘教於家故公之歿也冠卿以材尤知名端卿而下皆謹嚴能世其家者也女二人嫁邵武尉陳涉進士陳之邵冠卿等將葬公以銘屬公故

人子曾鞏銘曰

司封抱能屈初齡秉旄懷紱晚始亨沙墟莽崖肆經營馬羊茁肥獄訟平凜然氣志潔以清自微起隆用兢兢風流餘徽被家庭子多以才後方興

贈職方員外郎蘇君墓誌銘

熙寧元年春余之同年友趙郡蘇軾自蜀以書至京師謂余曰軾之大父行甚高而不為世用故不能自見於天下然古之人亦不必皆能自見而卒有傳於後者以世有發明之者耳故軾之先人嘗䟽其事蓋將屬銘於子而不幸不得就其志軾何敢廢焉子其

為我銘之余為之記其說曰君諱序字仲先眉州眉山其先蓋趙郡栞城人也曾大父欽大父祐父杲三世皆不仕而行義聞於鄉里祐生於唐季而卒於周顯德之間嘗以事至成都遇道士異之屏人謂曰吾術能變化百物將以授子祐辭不頌道士笑曰是果有以過人矣而杲始以好施顯名君讀書務知大義為詩務達其志而已詩多至千餘篇為人踈達自信持之以謙輕財好施急人之病孜孜若不及歲凶賣田以賑其隣里鄉黨至孰人將償之君辭不受以是至數破其業厄於飢寒然未嘗以為悔而好施益甚遇

人無踈密一與之傾盡無疑礙或欺而侮之君亦不變人莫測其意也李順叛攻眉州君居園中守禦會其父病沒君治喪執禮盡哀退慰安其母皆不失所宜慶曆初詔州縣立學取士爭欲執事學中君獨戒其子孫退避人皆服其行蜀自五代之亂學者衰少又安其鄉里皆不願出仕君獨教其子渙受學所以成就之者甚備至渙以進士起家蜀人榮之意始大變皆喜受學及其後眉之學者至千餘人蓋自蘇氏始而君之季子洵壯猶不知書君亦不強之謂人曰是非憂其不學者也既而洵果奮發力學與其子軾

轍皆以文學名天下為學者所宗蓋雖不用於世而見於家稱於鄉里者如此是不可以無傳也已君始以子恩為大理評事後累贈尚書職方員外郎享年七十有五慶曆五年五月十一日終於家八年二月某日葬於眉山縣脩文鄉安道里先塋之側夫人史氏蓬萊縣太君二子曰渙尚書都官郎中提點利州路刑獄公事有能名曰洵霸州文安縣主簿編纂太常禮書贈光祿寺丞孫七人位佾不欺不疑不危軾轍軾殿中丞直史館轍商州軍事推官銘曰
蘇氏徂西值蜀崩分三世高逝以篤吾仁君始不羈

勞躬以早孝于父母施及窮嫠維見之卓教其子孫終化鄉邦學者誥誥維子若孫同時三人擅名文章震動四方迺本厥初考祖之自刻詩墓石以畀厥裔

庫部員外郎知臨江軍范君墓誌銘

嘉祐五年六月辛巳尚書庫部員外郎知臨江軍事范君卒于位年五十有三其年十月辛酉葬于江州德化縣之仁貴鄉萬家山前既葬其孤屬君之故人李中考次君之官氏邑里與其功行之實為狀授使者使告於輦曰先君葬既得日月宜有銘孤安期也敢請輦曰君之行宜有述乃為之誌其墓而銘之其叙

曰惟范氏傳叙受姓自劉累以來其後居江州者出於晉豫章太守寧之後君諱端字思道江州德化人也祖祕書省著作佐郎贈太常少卿諱成象父尚書都官員外郎贈光祿卿諱應辰君始以父任為太廟齋郎累轉至尚書庫部員外郎歷德化尉江寧主簿江都令知南昌飛鳥彭山三縣通判通州徙泰州又為勾當開治畿內溝洫提舉陝西河北路便糴糧草至知臨江軍事而飛鳥以乞養太夫人得監江寧府鹽稅彭山用薦者得監雲安軍鹽井二縣皆不至君聚書萬餘卷強力篤學為人恭遜質儉能自脩飭門

內之治肅如也及施於為政以謹法能持廉名於世而世之能觀其內者亦少也始為江都會歲旱張若谷為揚州遣吏數人與君皆出視民田他吏還者白歲善君還獨白田實旱若谷初不是之也君持旱苗力爭乃卒是君所白吳遵路蔣堂為淮南轉運使使君護河役君往視之還言河不可為遂罷君用他吏護役而河果不可為三人者其初皆怒已乃感悟共薦之而當是之時天下之主財利者方務於急聚歛治民者以立聲威為賢交四方之賓客者又往往嚮意於卑辭貌煩饗燕贈送之禮以其故能傾士大夫

南豐文集 卷之三 十一
以干天下之譽君乃獨推息民教化之意以簡易自
守故為雲安主塩利而議蠲塩課以數萬為臨江以
興學教人為先而厨傳賓客之奉十去其七八四方
之往來者或出語訕君君不為之動也其正行直道
如此太夫人李氏贊皇縣太君父尚書工部侍郎虛
已元配某父龍圖閣直學士向次配周氏清河縣君
父尚書司封員外郎陵子男六人安期安仁安之安
世安壽安禮女五人長適和州司戶參軍鄭夷中次
適都昌主簿周誅次適郊杜齋郎周佺期餘尚幼孫
男六人萃叟岩叟渭叟商叟蒙叟真叟太夫人之喪

君哀感疾四年乃能起凡君之所既立可謂有士君
子之行非耶自不遵先王養士用人之法而士在閭
巷之間者用力於空文居朝廷者馳騁於虛名以謙
世取寵士之能脩其內潔身累行者非身好之篤莫能
至而世亦罕能知之也故君之事予喜為之見於文
使後之君子得覽焉君於文章尤長於詩有集三卷
藏於家其銘曰
君性溫溫好退持卑及其臨事擇義而為一世之棄
君獨從之一世之慕君獨違之行已有常在官無疵
曷以知之眎此銘詩

張久中墓誌銘

君姓張氏名持字久中初名伯虎慶曆三年来自曲江入太學當是時天子方詔學官歲獻士二人學者以數百千人獨獻君會學散不報於是時予盖未嘗識君也後二年過予之所居臨川始識之君為人深沉有大度喜氣節重交游一時所與之遊者甚衆而君所尤稱者廣漢張賁以為年少可進以學者莆陽陳惇盖君之學多賁發之而於惇以師友自處也凡君之與人交喜窮盡其得失其義足以正之而其直未嘗苟止也至其與衆人接尤溫以莊不妄與之言

與之言必隨其材智所到不病以其所不為故君之友皆憚其嚴而喜其相與之盡衆人之得君遊者亦皆喜愛而未嘗有失其意者其語曰士生於今勢不足以持世而遊於其間當如此也於臨川出其文章因學予言古今治亂是非之理至於為心持身得失之際於其義余不能損益也後二年死於興國軍某月某日也明年其弟來江南以力之不能將獨負君之骨以歸是時陳惇方以進士得出身約君之弟曰吾忍不全歸吾友耶明年吾得補為吏力能以君之柩歸其弟乃止君年若干祖某考某君幼孤養於兄

嫂嘗曰嫂之於吾猶母也婦能以姑之禮事吾嫂者
可以為吾婦矣然卒亦無也君固難交然不易其好
而陳惇者與君交尤深也予嘗眎惇與君之相從憂
窮齟齬無不共之其中心豈有利然也世之交友道
廢久矣其有之或非此也然則君之事其有取於世
教非邪惇以某年某月某日歸君之葬地而屬予銘
其辭曰
嗚呼久中不如其志孔孟已然何獨於子生而不大
天固為之其長在人於此觀之

祕書丞知成都府雙流縣事周君墓誌銘

君姓周氏諱旻字夢臣衢州江山人也曾祖漢規祖
德厚父幹君以進士及第歷南劍之將樂建昌軍之
南城主簿監虔州雩都銀場又為秦州司戶參軍用
薦者為祕書省著作佐郎知宣州南陵縣事遷祕書
丞知成都府雙流縣事嘉祐六年正月某甲子至江
陵卒於舟中年五十有一母某氏先娶毛氏又娶祝
氏子男三人曰某曰某女四人君之卒某始七歲清
江李中為之具喪事所須某年某月某甲子君之弟
嵩葬君於某縣某鄉某所之原君少孤力學不問生
業事母以孝稱在仕也嫁姊之貧者居常分月俸三

之一以奉之餘以與諸弟君與妻子或止食館券而已為人和平質簡其施於為政亦然及至有所必行人亦多所不能及也其為南城雩都取豪猾尤難治者三人皆繩以法君既見惡果於繩而去之故其餘皆歛跡不敢犯君法此君之行已居官已試者也所試者大將豈止於是歟銘曰
婉婉為人疑疑為吏此有愛慕彼無怨議孰厚其有孰艱厥施維銘昭之以諗來裔

元豐類藁卷之四十三

元豐類藁卷之四十四

南豐後學邵廉校刊

誌銘

殿中丞致士王君墓誌銘

君諱某字某其先琅邪人嘗徙家于蜀至君之考又徙家于揚故今為揚之江都人曾祖諱錫祖諱得中為真定府獲鹿縣令贈尚書刑部侍郎考諱汝能為尚書都官郎中贈尚書工部侍郎君少以父仕為太廟齋郎養其父不忍一日去左右至卒喪年已四十八餘始出為南劔州司戶參軍歷監劔州銀銅場和州

司戶參軍用薦者監潁州稅去為越州山陰縣尉滑
州錄事參軍隨州唐城縣令其為銀銅場冶者復業
而歲課大溢為尉能發奸偷為錄事能治獄不撓為
令能有惠愛於人其試於事者如此其為人居家孝
友遇人和易質厚不為聰明機巧以譁世動俗故知
之者少而君亦自若也至年七十遂上書還政遷太
子中舍今上卽位恩遷殿中丞賜緋衣銀魚卒於熙
寧五年之五月甲辰年七十有七以其年十月乙酉
葬于江都之東興寧鄉馬坊里以其配永嘉縣君周
氏祔有子二人曰幾大理寺丞曰深潤州丹徒縣主

簿皆有文行能世其家有女一人嫁陸氏有孫男二
人孫女二人尚幼也寺丞娶余之仲妹以書來乞君
之墓銘余不能辭也銘曰

養心以和動已以直不為世巧安於自得顯不在躬
寔詒爾子欲鴻厥聲勒銘于此

贈大理寺丞致仕杜君墓誌銘

君姓杜氏澶州濮陽人卒於皇祐元年十月庚申葬
於熙寧八年十月丁酉其墓在濮陽縣桂枝里之樂
村以夫人僊居縣太君潘氏祔君曾王考佑王考延
嗣考珣子男三人曰言曰宗諫皆蚤世曰宗誨殿中

南豐文集 卷四
丞女二人嫁馬氏樂氏孫男二人曰良輔餘未名也
君諱瑩字德温贈大理評事又贈大理寺丞為人孝
友温良以清靜為學而以淡泊自足行脩於家而譽
聞於鄉其自得者壽考見於身其有餘者流澤見於
後故其年至於八十而有子能大其門言理之士以
此多君也宗誨為人質厚恬夷世俗之所為有不為
者余為襄陽宗誨實僉書節度判官公事愛其所守
而知其有所受也其以君之銘乞於余故不辭銘曰
有以養其內克遐者壽有以行於遠克昌者後帝原
厥初追錫命書余與此銘賁于幽墟

胡君墓誌銘

君名敏生於天禧之戊午卒時皇祐之辛卯也既卒
之明年葬於其所家撫州金谿縣之東某里某原字
某姓胡氏父名晏教君學已為之求師又為之求四
方善人君子與之接致其力不敢懈至於老以死不
敢變君亦能奉其意故君之為進士其強學其廣記
其博問其能文辭於其業可以謂之修其事親其居
家與人遊不見其缺虧其約其質其不苟其寡言於
其行可以謂之脩夫積其勤以至於業之脩而止薦
於鄉積其謹以至於行之脩而不克顯於世此世之

所以哀君也然君有可以慰其親而不疚於其內比於得其欲富貴於一時而有愧於其心者其得失何如固易知也母某氏妻某氏子某弟某君嘗學於余也故銘之銘曰

慰其親學也勤短而屯塞不伸震無垠琢斯珉

光祿寺丞通判太平州吳君墓誌銘

龍圖閣直學士給事中吳仲庶具書載其子業官世行治屬余曰吾子某不克壽不得見其志幸得名信後世則某其不泯泯尚足以慰吾思也余為之述曰維吳氏以文學直道繼有顯人其家子晚出並茂亦

多以材能見於世君居其間孝友篤學有大志未見其止其不幸蚤死故君既自重無所試而其家蓋識君之事亦畧也君以父任守將作監主簿今上即位恩遷太常寺奉禮郎是歲進士及第僉書廣濟軍判官公事上書言時事有人之所難言者部多盜君請取酒場羨錢益賞購轉運使難其言君以聞詔用君議盜以哀息君以母濟陽郡君蔡氏憂去官服除遷光祿寺丞通判太平州州賴以治行部中視河還不入其家將行廣濟圩度姑熟溪橋壞以水死年三十有三熙寧八年四月某甲子也朝廷聞而官其一子

君娶陳氏尚書職方員外郎亢之女前君一年死子
曰墳郊社齋郎曰圻未仕女一人始五歲君初名秉
禮字子鈞其先興國軍某人曾祖考某祖考某贈戶
部尚書仲庶名中復以君卒之二年正月某甲子葬
君南康軍都昌縣沐浴保之龍回山以陳氏祔銘曰
家紀其行官紀其能收科于少是紹是承維曰未試
方勃而起云胡不遐一跌而逝命則誰為昧不可稽
畀爾萬年式諗以辭

殿中丞監揚州稅徐君墓誌銘

唐之亡疆者分其地為國以十數揚行密有淮南稱

吳海州人徐溫為吳將有功行密死三子相次立溫
用事貴顯溫死其養子知誥遂代楊氏盡有江淮之
地稱唐去溫所與為姓名者姓李氏名昇溫已子知
諫事昇為將死昇追以為中書令臨淄王知諫子遜
事昇子璟為中書侍郎上饒郡公遜子徐君事璟子
煜為其秘書郎賜緋魚袋宋既受命平天下俘李氏
以歸徐君亦隨之京師得為太常寺太祝不樂棄官
歸江南久之為殿中丞監揚州稅以死子天錫為秘
書丞亦死女四人其第二女與季皆嫁呂氏徐君死
祥符間後四十餘年嫁呂氏女有子倚始葬徐君與

徐君之母李氏妻陸氏於揚州之某原方徐氏之先
與楊氏俱起東南收其土地而有之遭行密子弱徐
氏寔任其國至昇遂代吳而徐氏子孫亦皆據士民
之上有王公之勢於其一時富貴之際豈非盛哉百
年之後其世凌遲至於徐君遂死而無以葬葬於異
姓之孫盛衰之變何其速也然自前世無不皆若此
富貴之不可以久恃亦何必異也而世之不安其命
者方枉義挈挈以覬幸其偶得之者又惴惴恐失之
是真可以常處也哉初東南之地既入於有司天子
憐士民許皆復田其故所有地徐君之地為尤多多

不取有冒徐君之地以賣之者亦不問是以其貧甚
而徐君獨自得徐君諱元榆字僊材好學善屬文吏
部賈黃中嘗試其書判曰元白不足多也尤能詩詩
數百篇號南歸集大抵多慨其不得志徐君之所以
自見也嫁呂氏女之夫名某憐徐君之死無以葬死
以屬其子倚倚貧甚能自力卒葬徐君而就其父志
銘曰
富吾不爭可謂既好之貧吾不對可謂又安之諧婦
此丘女子之為求昭厥聲維此銘詩

永州軍事推官孫君墓誌銘

黟縣之孫氏有起進士為尚書工部郎中廣南西路
轉運使以卒者諱杭以文學見於世其葬在黟之上
林有子亦起進士為永州推官以卒卒時年二十有
八者諱適亦以文學見稱葬在其父之左將葬其弟
邈以告而乞銘於南豐曾鞏其序曰孫氏世家富春
唐有徙歙之黟縣者諱師睦始自別為黟縣之孫氏
師睦生延緒延緒生旦旦生遂良以子恩為尚書職
方員外郎職方生工部工部實生君君年十有四辭
親學問江東已有聞於人往從臨川王安石受學安
石稱之後主越州上虞簿去以父恩得永州父卒萬

里致喪疾不忍廢事既葬携扶幼老將菽食淮南疾
益革遂卒於池州大安鎮寔至和二年始工部為御
史不合而出及使南方仆且起遽卒君尤自力學行
謂蘊必發其在君又止此君於學問好其治亂得失
之說不徇近卑於為文以古為歸不夸以浮雖素羸
不廢書雖進不忘以止既肆而通矣而不得極其志
其銘曰

孫世來黟拔身艱故為世聞家始自工部工部孰有
有書百篇求州之學自其父傳其果以力其敏以明
內有其質外以華英再以不就其後當侈君不有子

君多兄弟

尚書都官員外郎王公墓誌銘

王氏其先太原人世久遷徙而今家撫州之臨川公諱益字舜良曾祖諱某不仕祖諱某以子故贈尚書職方員外郎考諱某以公故即其家拜衛尉寺丞公祥符八年舉進士及第初為建安主簿時尚少縣人頗易之及觀公所為乃皆大畏服其督賦稅未嘗急貧民或有所笞罰唯豪劇吏耳以故建安人尤愛之嘗病闔縣為祠禱改臨江軍判官軍多諸豪大姓之家以財力自肆而二千石亦有所挾為不法吏乘其

然乾沒無所忌公至以義折正二千石使不能有所縱以明憚吏使不敢動搖居頃之部中肅然諸豪大吏見公皆側目而視至以鄙言目公曰是不可欺也卒不得已以他計出公領新淦縣以治聞去改大理寺丞知廬陵縣又改殿中丞知新繁縣縣有宿奸數人公既繩以法其餘一以恩信遇之嘗踰月不笞一人知韶州改太常博士尚書屯田員外郎嶺以南素習於夷無男女之別日浸月滋為吏者師耳目謂俗止如此九姦事雖得有可已者皆不究公曰夫所謂因其俗豈謂是耶居郡求姦事最急苟有萌孽一

切摘發窮治之屬縣翁源多虎公教捕之令欲媚公
言虎自死者五輿之致州為頌以獻公使婦之曰政
在德不在異州有屯兵五百人代者又不至欲謀為
變事覺一郡皆駭公不為動獨取其首五人即日斷
流之或請以付獄公不聽既而聞其徒曰若五人者
繫獄當夜劫之然後衆乃服韶居南方雖小州然獄
訟最多號難治公既以才能治之有餘遂以無事又
因民之暇時為之理營驛表坊市道巷使皆可以久
遠為後利婦丁衛尉府君憂服除通判江寧府改都
官員外郎二千石常以事倚公公亦為之盡寶元元

年二月二十三日以疾卒於官享年四十六母謝氏
封永安縣君娶徐氏又娶吳氏封長壽縣君子男七
人曰安仁曰安道曰安石曰安國曰安世曰安禮曰
安上女一人嫁張氏處者二人安石今為大理評事
知鄞縣慶曆七年十一月上書乞告葬公明年某月
詔曰可遂以某月某日與其昆弟奉公之喪葬江寧
府之某縣某處吾嘗聞鄉里長老言公為人倜儻有
大志在外當事輒可否矯矯不可撓及退歸其家歛
色下氣致孝於父母致愛於族人之間委曲順承一
以恩自克位不滿其志故在外之所施用者見於小

而已今吾所書是也其大可知則家行最篤已先人嘗從公遊其言亦然而吾又與安石友故得知公事最詳其將葬也使者以安石之述與書來請銘遂為之銘其尤可哀者也

公堂有母老不覺衰公庭有子仁孝而才世所可喜公兩棄之莫不皆死公有餘悲

衛尉寺丞致仕金君墓誌銘

今上皇祐二年祀明堂推恩群臣祕書丞金君得以其父為大理評事致仕五年郊金君為太常博士又得以其父為衛尉寺丞惟衛尉府君諱某字溫叟浮

梁人初君之考贈大理評事諱某有三子伯曰鼎臣為某軍節度掌書記仲曰汝臣為太常博士季即君兄弟俱舉進士書記與仲既起家君因不復肯就舉曰吾兄弟不可俱去吾親也後三十餘年卒以有子為丞云君有四子曰君著曰君佐曰君卿博士也曰君佑兄弟又皆舉進士博士既有名秩于朝三子皆復養於家蓋其父子兄弟之出處如此何其相似也當是時宋興已百年博士方以材自起於賤貧欲以其所為為天下慨然有志者也君獨自得於大山長谷之間日從子孫來四方之客與夫鄉人之老詩書

樽席之側嘯歌息偃以忘其年隕然遂其志者也遭
天子既宗祀明堂碩朝士大夫皆褒崇其親欲以風
示天下命書寵章降于其家顯榮一時壽考康寧有
孫有曾以承以翼何其祥也君為人簡易無町畦能
事父兄衣食奉養自與者嘗取其薄嘗有盜其牛羊
已又盜其所乘馬者君知之皆不校盜卒自悔以伏
蓋君之質與其恕又有足多者如是也生於淳化之
庚寅卒於嘉祐之丁酉遺命三月而葬從薄遂以其
年十二月四日葬于饒州浮梁縣萬戶山之前夫人
徐氏累贈壽安縣君君之歿也有子四人女六人孫

男九人女十二人曾孫男三人女二人金氏或曰出
少昊金天氏或曰出漢侍中稔侯傳至孫則亡至曾
孫復侯而稔侯有弟倫倫子若孫四世六人皆侍中
以忠孝名尊顯於世世稱金氏云至君之先皆家京
兆唐僖宗時有令浮梁者遭黃巢亂徙人築險自保
所活人以數萬因留治之九十有七年遂家浮梁以
功至檢校尚書右僕射昭信軍節度使諱某君曾祖
也子諱某君祖也博士以君之外孫尚書屯田員外
郎臧論道之狀來屬曰子為我銘吾親吾死足矣輦
不敢辭銘曰

早少恭老惟物之常即強棄父廼理之亡帝用慨然
尊祀明堂碩袞耄壽風示九有君勢之亨與享其榮
擁笏巍巾於家以息有子有孫嚴嚴我側志無不得
君子之祥銘以發之君子之光

撫州金谿縣主簿徐洪墓誌銘

嘉祐元年虔州安遠闕縣令建安徐洪以撫州金谿
主簿攝安遠事明年八月十一日死安遠十二月其
父尚書屯田郎中舉以書告君之故人南豐曾鞏曰
子為我銘洪之墓遂考次君世序行已歷官卒葬之
終始銘於其墓曰君曾大父某某官大父某某官君

字孺興為人大志讀書好其治亂得失之大旨為
文長於辨說其奔放馳騁上下反復之際有足壯也
未冠聲號聞四方初中進士除洪州司戶參軍不就
退居大江之南好倜儻非常之奇節不肯少屈於人
居八年以父命始強出為主簿非其好也君居家遇
人無親踈豁如也樂赴人之急為主簿不以非其好
故怠其意其治能有愛於人金谿富人錮山林之利
數十年君始奪之而縣之貧人賴其利益君之所試
者小其為日又近而其所既立如是也享年三十有
二死之若干日葬饒州鄱陽東門外母某氏某縣君

妻凌氏黃氏男一人曰還孫始二歲女四人尚幼也
銘曰
嗚呼儒興志果而大不勝于柔以室其外不隕其剛
以亨于內胡短其施而多其與父老失子兒嬰失父
維銘告哀以納于墓

太子右司禦率府副率致仕沈君墓誌銘

君諱某字某姓沈氏沈氏自齊太子家令約家於吳
興故世為吳興人至君之大父諱某考諱某始自吳
興之東林徙家於錢塘故今為錢塘人君以宗室密
州觀察使宗旦恩即其家得為太子右清道率府副

率致仕又以祀明堂恩遷太子右司禦率府副率兼
官檢校國子祭酒兼監察御史階銀青光祿大夫勳
武騎尉蓋密州觀察使宗旦者今天子之姪潞王之
孫而其母夫人蓋君之姪也君為人質朴無外飾其
居鄉間寬然長者也其事父兄能力以嚴眎族人能
愛以均雖饒財為大家而衣服飲食自與尢寡約至
人有急歸我則推財赴之無錙銖顧惜意隣里 歲
饑輒發倉以救人有欺其財者皆不校既老治其家
事不肯懈曰吾先人之所以付我也處其子孫不以
逸曰所以使汝守吾先人之法也嘉祐二年三月一

日以疾卒于家享年七十有六其年十一月十五日
葬錢塘之西城初娶吳氏再娶車氏某縣君其葬也
吳氏實從子三人曰曄曰晔曰時孫八人曰沔曰溱
曰沂曰淑曰灌曰湜曰漸曰渥曾孫三人曰師揚曰
師荀曰師軻時沔沂皆舉進士餘亦皆有學行蓋君
之教也銘曰

赫赫宗子保藩于密天子曰嘻汝惟沈出子假汝寵
錫其外親東宮之屬有長衛軍命君于家俾休其老
以偃以側服章華好天子命我匪我有求隤然順退
媚于林丘不蘊為機不阻為畦曰遠無仇曰近無庇
里巷之依惟此令人流聞餘澤化其子孫惟身之祥
既壽而康惟後之祥宜熾而昌惟墓有域其藏有石
刻此銘詩昭示無極

寶月大師塔銘

君名脩廣字叔微杭州錢塘人姓王氏九歲出家學
佛居州之明慶院十一歲落髮為僧景佑二年詔賜
紫衣五年又賜號寶月大師治平某年州選為管内
僧正熙寧元年十月感疾癸丑會門人與常所往來
學佛之人告以將終其夕沐浴易衣正坐而卒享年
六十有一門人曰慈化大師了性曰崇照大師了然

曰賜紫衣了蘊以明年某月某甲子為塔葬君於某縣某鄉某原君為人樂易慈祥有智識度量人不見其喜怒讀五經畧知大義頗喜為詩少羸多病始學為醫既成而有疾者多歸之無貴賤貧富皆為之盡其術未嘗有所厚薄尤貧者或資之衣食以其故自京師至于四方自公卿至于學士大夫多知其名既見皆樂從之游而鄉邑之人至于羈旅游客其歸之者無不厭其意君於接之雖勞未嘗有懈倦不欲之色於資之藥物衣食雖窮無未嘗有所計惜其應外者如此及退而處夫貧富死生之際又有所不累其

心故至於不能自給而未嘗動意至於且死而未嘗變容改色噫是非可銘也歟銘曰

不以貧故累其心此學士大夫所難至於遭死生之變而不驚又難也君之學不同而自得者則然固不可以無傳况於名聞於世行信於人故為之書尚使長存

元豐類藻卷第四十四

元豐類藁卷之四十五

南豐後學邵廉校刊

誌銘

金華縣君曾氏墓誌銘

夫人嫁王氏為侍御史諱平妻姓曾氏泉州晉江人
 祖諱穆殿中丞追封魏國公考諱會尚書刑部郎中
 集賢殿脩撰追封楚國公皆累贈太師中書令兼尚
 書令妣黃氏楚國太夫人未嫁承順父母盡子道既
 嫁夫家貧養姑盡婦道輔其夫盡妻道夫死寓食於
 穎以勤儉積日大其家以誘教不倦成其子又可謂

南唐文集 卷四十五
畫母道也蓋其子五人回向固同罔皆有學行回有道為儒宗向罔尤有文三人皆身在隱約而聲震天下於是時夫人兄魯公公亮實為宰相當國然夫人處里舍彌約未嘗以為泰及其後回向同罔皆蚤世人以為難處夫人能自廣以理未嘗亂其志教養其孫至男有立女有婦熙寧之間魯公告老以太傅侍中就第夫人少魯公一歲食其子祿皆居京師二人白首相碩怡然元豐元年春魯公薨四月丁卯夫人亦以疾終春秋七十有九夫人以夫恩封金華縣君以魯公恩賜冠帔子回忠武軍節度推官知陳州南

頓縣事向峽州硤石縣主簿固大名府軍巡判官國子監主簿同陳州宛丘縣令罔蔡州新蔡縣主簿女嫁大子右贊善大夫陳臻古孫五人泌汾汶沂潢汾郊社齋郎汶試將作監主簿夫人既卒之明年某月某甲子葬穎之汝陰縣懷音鄉南高村祔御史之屯其將葬也固以狀來乞銘惟夫人為子若婦為妻若母皆盡其道於難阨流寄之中能立其家成就其子所以自處於通塞之際者無不當於理是其智術德性過人遠甚宜得銘且余實與其子遊最舊乃不辭而為銘曰曾禹之苗氏自鄆子或言厥志有稱闕里

或以孝顯於經實紀或守所聞羞踐霸軌遙遙千載
歷世有聞自荆祖粵篤生夫人楚公之子魏公之孫
魯公維伯御史是嬪迺立厥家自墜而興迺教厥子
自幼而成象服貂冠伯也在廷子也在幽碩實洪聲
莫親已宗莫重夫氏兩有其盛世誰與媿維能既試
維德寔孚尚寵爾從列銘陰墟

壽安縣君錢氏墓誌銘

劉凝之仕既齟齬退處廬山之陽初無一畝之宅一
壘之田而凝之囂囂然樂若有餘者豈獨凝之能以
義自勝哉亦其妻能安於理不戚戚於貧賤有以相

之也凝之晚有宅於彭蠡之上有田於西澗之濱子
進於朝廷薦於鄉閭凝之夫婦康寧壽考自肆於山
川之間白髮皤然體不知駕乘之勞心不知機樸之
畏世人之所慕者無慊焉世人之有所不能及者獨
得也其夫婦如此可不謂賢哉熙寧九年凝之年七
十有七哭其妻之喪自為狀次其妻之世出行事來
乞銘予為之因其言而識之曰夫人姓錢氏考內殿
崇班穆祖考內閣使昭晟曾祖考宣德軍節度使同
中書門下平章事湛高祖吳越文穆王元瓘夫人色
莊氣仁言動不失繩墨居族人長幼親疎間盡其宜

事夫能成其忠教子能成其孝是皆可傳者也夫人年七十有三卒於四月之庚子而葬於其歲某月某甲子墓在南康軍西城之某原初以凝之恩封壽光縣君再以子恕恩封壽安縣君有子曰恕祕書丞曰格鄉貢進士皆以文學顯於世女嫁進士徐彥伯太子中允黃廉孫某某凝之名渙筠州某人今為尚書屯田員外郎致仕銘曰

士不苟合安於賤貧其難其豫繇嬾有人維不終窶又壽以康有續孔辰既庶而臧世迫而求獨優以取世儒以處獨肆而有士也則然女實作輔考則錢媛

尚配千古

天長縣君黃氏墓誌銘

夫人姓黃氏福州福清縣人祖諱某考諱倫皆仕閩越夫人嫁同縣林氏為殿中丞諱某之冢婦尚書屯田員外郎諱某之妻有子曰槩為太常博士集賢校理有孫八人曰希宣州涇縣主簿編校集賢院書籍曰旦明州象山縣令曰邵杭州南新縣令曰顏許州臨川縣令曰稽曰雄未仕也其二人早卒有曾孫十有二人曰睿處虞虞虔膚據處其三人亦早卒夫夫人年七十有七治平四年正月癸丑卒於京師之昭化

坊累封嘉興天長二縣君始殿中府君與其配福清縣太君鄭氏皆春煠高安其鄉里不肯出屯田府君乃從事漳州泉州興化軍踰二十年終養而後去夫人能盡其力治飲食衣服以進及喪能盡其哀皆如其夫之志其子既就學夫人常夜治絲枲居其旁以勉之至其後其子遂以文學名天下既而其子不克壽屯田府君亦卒于官諸孫皆幼夫人已老矣乃栖吳郡斥賣簪珥以經理其家絲蓄粒聚至有田以食有宅以居平晷日夜課諸孫以學有不中程輒朴之及長遂多知名連以進士中共拜涇縣復校書集賢

世其父職夫人乃碩諸孫謂曰吾始得事祖姑今得弄曾孫遂保有汝家起于既墜吾老且死不恨矣涇縣既服夫人之喪以其柩歸吳郡寶華山某年某月某日附屯田府君之兆而屬余銘銘曰

女職在宮行止于柔扶微捄阨則匪我謀勢有孔棘義不得寧任重于已振壞為興我儲我積乃續烝嘗我字我飭乃襲印章蒼顛秀眉燕其作止其燕伊何維終受祉莫仁且智疇濟登茲播告無極視此銘辭

仁壽縣太君吳氏墓誌銘

仁壽縣太君撫州金谿吳氏尚書都官員外郎贈尚

書刑部侍郎撫州臨川王公諱益之夫人衛尉寺丞
諱用之之婦年六十有六嘉祐八年八月辛巳卒于
京師十月乙酉葬于江寧府之蔣山夫人好學強記
老而不倦其取舍是非有人所不能及者然好問自
下於事未嘗有所專也其平生養舅姑甚孝蓋侍郎
七子而少子五人吳氏出也然夫人之愛其長子甚
於少子曰吾愛之甚於吾子然後家人愛之能不異
於吾子也故其子孫已壯大有不知為異母者居久
之二長子前死夫人已老矣每遇其婆婦異甚而身
為字其孤兒忘其力之憊也其處內外親疎之際一

主於恩有讒訕踞罵已者數困苦常置之不以動聲
色亦未嘗有所含怒於後也有以窮歸已者急或分
衣食不為秋毫計惜以其故至不能自給然亦未嘗
不自若也其嫁三從之孤女如已女而待長子之母
族如已族蓋篤行如此而天性之所有也其自奉養
未嘗擇衣食其視世俗之好無足累心者方其隱約
窮匱之時朝廷嘗選用其子堅讓至於數十或謂可
強起之夫人曰此非吾所以教子也卒不強之及處
顯矣其子嘗有歸志而以不足於養為憂夫人曰吾
豈不安於命哉安於命者非有待於外也其子為知

家其夫為吏有名稱夫人實相之及春秋高於內外
屬為高曾行而慈幼字微愈久彌篤故親踈懷附
無有惡敦昔先王之治必本之家達於天下而女子
言動有史以昭勸戒後世以古為迂為政者治吏事
而已女子之善既非世教所獎成其事實亦罕發聞
於後其苟如此其衰微所以益甚則夫人之事其可
使無傳也哉夫人嫁沈氏其夫諱周太常少卿贈尚
書刑部侍郎其舅諱某贈兵部尚書杭州錢塘人夫
人封六安縣君壽昌縣太君年八十有三熙寧元年
八月丁巳卒於京師二年八月某甲子合葬杭州錢

塘縣龍車原子曰披國子博士有吏材曰括揚州司
理參軍館閣校勘有文學其幼皆夫人所自教也女
二人蚤卒銘曰

生民之治必本于身教行于家餘以為人世弊俗偷
恕于在已內替常度外彊于理淑惟壽昌學與心成
篤于孝慈匪勸而能有翼于夫有迪于子尚類古人
其傳以此

德清縣君周氏墓誌銘

夫人姓周氏湖州長興人曾大父諱某大父諱某父
諱某嫁同縣陳氏為秘書省著作佐郎諱某之妻為

人柔嫻靜莊在父母家至歸于夫氏本於自脩而卒
於能孚于屬人陳氏有姒婦寡居當家事夫人常曲
意下之於事常退避不敢與姒婦以其故碩夫人甚
懽而親踈觀者莫不悅著作有田數千畝而愛士好
施夫人常悉力助之以其故至不能自給而夫人處
之自若遇子之非已出者與已子無毫髮厚薄意人
以為過人而夫人若有所不及也享年三十有五封
德清縣君子曰樞為尚書屯田員外郎曰楷曰權未
仕也卒於慶曆五年之二月辛丑葬於熙寧三年之
三月庚申其墓在長興縣永昌鄉下山之陽銘曰

嗟淑人體明德外惟均內自克不末年隕嬪則兆親
宮藏石刻

夫人周氏墓誌銘

夫人諱琬字東玉姓周氏父兄皆舉明經夫人獨喜
圖史好為文章日夜不倦如學士大夫從其舅邢起
學為詩既嫁無舅姑順夫慈子嚴饋祀諧屬人行其
素所學皆應儀矩有詩七百篇其文靜而正柔而不屈
約於言而謹於禮者也昔先王之教非獨行於士大
夫也蓋亦有婦教焉故女子必有師傅言動必以禮
養其德必以樂歌其行勸其志與夫使之可以託微

而見意必以詩此非學不能故教成於內外而其俗
易美其治易洽也茲道廢若夫人之學出於天性而
言行不失法度是可賢也已其夫來乞銘予與之親
且舊故為之序而銘之蓋夫人之王父諱協為尚書
刑部郎中父約今為尚書虞部員外郎青州益都人
也夫人嫁關氏為徐州豐縣令景仁之妻為尚書職
方員外郎贈尚書都官郎中諱魯之子婦生一男二
女年二十有六卒於治平二年之九月某甲子葬於
杭州錢塘縣履泰鄉葛松原實某年某月某甲子關
氏錢塘人也銘曰

女有圖史傳于師氏其勸以樂其康以禮能此非他
繇學而已王政之興蓋自此始今孰登茲維周之媛
學繇自好終之不倦言循于矩行循于典尚配古人
輝光日遠

永安縣君謝氏墓誌銘

宋故衛尉寺丞王公諱用之之夫人尚書都官員外
郎贈尚書工部郎中諱益之母姓謝氏累封永安縣
君其卒皇祐五年之六月十四日其葬於撫州金谿
縣某鄉某原既卒之百有五十一日也其子曰益曰
某皆已卒曰某曰某曰孟楚州司理參軍亦已卒其

孫曰安仁宣州司戶參軍曰安道皆已卒曰安石殿
中丞通判舒州曰沆荆南府建寧縣令曰安國曰安
禮其曾孫曰某曰某曰某其墓工部故人之子曾鞏
誌之曰王氏由工部之叔父尚書主客郎中贈太常
少卿諱觀之始起家為能吏遂追榮其父諱某為尚
書職方員外郎至于工部父子遂皆進于朝為聞人
其世浸大夫人及拜其舅與夫之榮而享其子與孫
之祿其壽至于九十其卒於撫州之臨川安於其寢
余既與夫人之諸孫遊而嘗得拜於堂上見其色和
其容謹聞其言儉而勤退而聞其為婦順為母慈知

其所以享其福祿者其宜也已余觀詩人之歌其后
妃至于諸侯大夫之妻內脩法度輔佐其夫而其効
之見則兔置之人至于江漢汝墳之婦女皆承其化
而薦於禮余固歎其當是之時上下之間內外相飭
何其至也如夫人之資而使出於其時則必有歌於
風而被之于無窮之事若余之鄙其亦曷能知其所
至也哉謝氏之祖曰某考曰某銘曰
士顯其施其行易知女處于私其有孰窺嚴嚴秀眉
不見缺虧曷以長之眎此銘辭

求安縣君李氏墓誌

夫人姓李氏其先燕人而今家許州之長葛贈太子太傅諱譚之曾孫贈禮部尚書諱運之孫贈刑部尚書諱昌言之女而母晉平縣君聶氏也夫人嫁駱氏駱氏亦家許州之長葛其夫諱與京為某官檢校某官知某州享年七十有九封永安縣君有子男四人長吉逢吉元吉皆三班奉職早卒嘉福今為右班殿直女三人亦早卒夫人以嘉祐八年十一月丙辰卒于其家之正寢而以熙寧二年十月葬於許州長社之舞鸞鄉白兔里附駱侯之塋夫人仁孝慈恕言動必擇義理事父母不違其教事舅姑不違其志事夫

順而有以相其善遇子至于內外屬人一以恩而不違於禮初刑部之兄昌齡當太宗真宗時輔朝政李氏族大而貴然刑部嫁女常擇寒士而至其後多為名臣范文正公仲淹鄭文肅公戩與駱侯是也夫人之弟光祿少卿禹卿余妻父也寔葬夫人故屬余銘銘曰

性有能否行有失得一當於理士有不克淑哉夫人秉是壺爨周旋大小無過無虧貴不稱德壽則謂遐維藏在許永裕厥家

試祕書省校書郎李君墓誌銘

君諱迂字明遠姓李氏為人孝友慈恕讀書務大旨
生五代之際再試明經不合退居楚丘有田百餘頃
皆推與其族人獨留五頃而已曰無令子孫以財自
累也宋初秘書監彭君薦其行義詔以為試祕書省
校書郎而君終不肯強起淳化三年壬辰九月二十
一日以疾卒于家享年八十有四維李氏遠出於臯
陶而其後李耳之孫曇為秦司徒曇子牧事趙始家
趙郡牧子汨汨子左車於趙號廣武君廣武君子遐
涿郡太守遐子岳諫議大夫岳子秉潁川太守又徙
家潁川秉七世子膺河南尹膺子瑾復家趙瑾曾孫

楷晉治書侍御史有子五人曰輯是芬勁勸以所居
巷東西自別故勁稱西祖勁子隆後魏阜城令隆後
九世棲筠唐御史大夫贊皇文獻公文獻公子吉甫
相憲宗吉甫子德脩楚州刺史德裕相文宗武宗楚
州子煇宋州宋城令君曾祖也又徙家宋之楚丘故
今為楚丘人宋城子確萊州膠水令君祖也膠水子
譚磁州却鞞令君考也却鞞之少子運為太常少卿
有子曰昌齡太宗真宗時為尚書戶部侍郎參知政
事故膠水贈太子少保却鞞贈太子少傅君娶丁氏
王氏王氏有子曰昌震為建州松溪令贈尚書駕部

郎中駕部有子曰漢卿今為諸王府侍講尚書虞部
員外郎虞部有子曰彥龍彥龍復有子四人矣君卒
後七十四年治平三年丙午四月某甲子虞部葬君
於開封府開封縣保安鄉永寧里之原以王夫人從
銘曰不累於物全吾質兮不羈於世遂吾志兮作宅
新原維孝孫兮納銘幽焉永淑聲兮

試秘書省校書郎李君妻太原王氏墓誌銘

夫人姓王氏太原人嫁趙郡李氏為磁州邯鄲令贈
太子少傅諱譚之冢婦試秘書省校書郎諱迂之妻
為人明識強記博覽圖籍子孫受學皆自為先生其

行仁孝慈恕始於為女中於為婦終於為母無不盡
其道享年八十大中祥符三年庚戌十二月己巳卒
於號州盧氏縣其子之官舍子曰昌震建州松溪令
贈尚書駕部郎中駕部子曰漢卿今為諸王府侍講
尚書虞部員外郎虞部嘗為李氏九世譜其博而詳
多夫人之所為言也治平三年丙午四月丁酉虞部
以夫人之喪從校書君葬於開封府開封縣保安鄉
永寧里之原銘曰

嗚呼夫人既有其質又肆爾力古有遺辭罔不采獲
克踐以躬亦畀爾息維瘞有銘尚以載德

池州貴池縣主簿沈君夫人元氏墓誌銘

夫人姓元氏錢塘人祖諱德昭事吳越國王錢氏宋興贈太保考諱好文尚書比部員外郎贈某官嫁吳興沈氏其舅為尚書屯田郎中諱某一作玉其夫為池州貴池縣主簿諱播夫人在父母家內外上下親疎長幼皆宜之年十有七而嫁既嫁如在父母家時貴池君早世無兄弟太夫人春秋高諸子尚幼夫人年三十餘於羈旅單獨之中闔門事姑能盡其孝教養諸子至其後皆為成材能世其先人方其憂戚難阨之時人恐其不能堪夫人既奮厲經理以保有其家

又退能自安不亂其志是人之所難而其後世之不可以無述者也夫人年七十以治平三年某月某日卒卒之若干日葬真州楊子縣甘泉鄉三城里北山之原子男四人皆進士曰伯莊未仕曰季長越州司法參軍曰叔通秘書省著作佐郎曰次通試將作監主簿貴池君於先人為同年友而諸子又與余遊故為銘銘曰

元出於危於東得姓有保有郎重世之盛允淑夫人集享家慶來嬪沈宗作德維令處平不盈在險能正姑曰微婦余老誰據子曰微母余幼誰怙自振單弱

卒持艱急老肆而安幼強以立實保沈宗自替而昌
有烈如此何愧丞嘗後世原美孰可無述刻辭幽宮
庶幾不沒

雙君夫人邢氏墓誌銘

夫人邢氏無為軍巢人也嫁為贈大理寺丞姓雙氏
諱華之妻封萬年縣太君子男三人曰漸為尚書屯
田員外郎通判吉州軍州事餘未名皆早夭夫人年
八十有六嘉祐四年九月二十七日卒於宣州之官
舍六年十二月二十七日葬于無為軍巢縣無為鄉
惲良里之原方大理府君之在隱約屯田始就書學

夫人能經理其家使無內憂以卒就其志及屯田有
列於朝夫人食其祿養就封大縣實受成報天之施
與善人豈非信哉夫人之在疾也屯田之配長壽縣
君陳氏供養營救有過人之行州上其事天子聞而
嘉之勅州使致粟帛賜其家於是人知夫人之善不
獨能成其子又能化其家也銘曰
允淑夫人秉是壺爨有譚車服維寵嘉之葬有卜壤
其吉在斯推求美實眎此銘辭

旌德縣太君薛氏墓誌銘

夫人姓薛氏累封旌德縣太君為故太子右清道率

南豐文集 卷五 十六
府副率致仕贈右監門衛將軍姓段氏諱某之妻今
提點江南東路刑獄公事禮賓副使名某之母某州
某縣人也大父諱某當吳越錢忠懿王時娶王女為
王國官父諱某祥符初為東頭供奉常將屯宮門而
監門之父右班殿直諱某者屯三陽二人者以意氣
喜相得也遂以夫人歸段氏夫人性柔淑能和其屬
人自佩服櫛珥凡資已者常出於儉而有餘好施雖
盡費不以為侈也生男一人禮賓也女二人長適開
封黃思問次適吳郡潘孝孫皆進士夫人年四十有
三大中祥符七年五月某甲子以疾卒於京師之敦

教坊某年某月某甲子祔其夫人柩葬於某州之某
縣某鄉某所之原前葬禮賓稱夫人之行與其世序
封號之詳託銘於南豐曾鞏為述而銘之曰約乎已
厚乎人發其積在子孫辭兮翟列封君碣兮石塚銘
文

永興尉章佑妻夫人張氏墓誌銘

夫人姓張氏建安人父諱士龍舉進士嫁同郡章氏
為永興尉佑之妻所出三男四女曰造适述皆舉進
士造及第為清海軍節度掌書記女嫁俞瑾徐立之
陳震亦皆舉進士其一蚤死初永興府君起家二十

南豐集 卷四十五 七
年止於為尉及死三男尚幼造既起又蚤死已而适亦死夫人維能忘其貧所以使其夫能屈於小官而說維能務其生所以使其子能安於幼學而成維能順其性所以居流離顛頓之間而不為悲哀愁憂亂其志也其為人卑極於順其為人尊極於慈推於其疏宗遠屬之間極於愛男之有不能葬者為葬之女之有不能嫁者為嫁之忘其力之匱而為之也此皆古今學士儒者所難而女子之善能如此此非可銘者歟嘉祐二年十一月三十日卒於洪州之私第即以其年十二月十八日葬于洪州某州之某鄉某原曾

彼以吾窮我以吾仁二者皆天吾樂而因壽止七十豈不得年維其有之愈遠彌傳

福昌縣君傅氏墓誌銘

福昌縣君姓傅氏會稽人尚書職方員外郎霖之女同郡尚書職方員外郎關公魯之妻後關公五年至和三年二月丙申卒于家年六十有四子男八人景荼景元景仁希聲杞景山景宣景良女一人景華嫁著作佐郎史叔軻福昌君在家為父母所器異既嫁而夫屬無退言布衣惡食身治細微故關公之祿及其疏昆弟姊妹之孤其事關公正以從其教子慈以

蕭關公起進士為郎為池台兩州年八十以歸曰吾少得盡力于官而老得自休于家不以家事累吾志者以有夫人也八子學行脩立景芬希聲杞同時皆中進士夫人之卒景芬為江陰尉希聲寶應尉杞和州判官景元亦以父恩為廣德尉皆能其官景仁而下皆有聞於人寔受教於夫人也始關公既貧而孤其仕與婚又皆後至其終有百口為大家福昌君維厚勤薄養所以經理其微維可否以明行止以公善訓能使誠恕愛人所以使其家有節法以有其成也某月甲子從葬錢塘之某源其子來屬以銘景宣子

妹婿也宜為銘其辭曰

關氏爰昔始如萌芽台州奮拔垂寔敷華進勤退佚不卹其家繇媿有人作其內治孰致其休不懈于勤孰致其隆不簡于細高明純約坦坦其夷無怨無疵小大化之有容有則婦子順之公為朝老子宦以成象衣華軼我止我行巍冠文笏我翼我承公曰微子誰據誰依子曰微母莫濟登茲云誰無母其孰無妻為妻為母如我誰亢生雖有止存也其長鴻鴻號聲垂此銘章

沈氏夫人墓誌銘

南豐文集
卷之三
夫人姓沈氏其先家于越之會稽曾祖仁諒令海州之胸山徙家于和州歷陽故今為歷陽人祖平贈尚書刑部侍郎父立今為右諫議大夫判都水監母馮氏濮陽縣君董氏仁壽郡君夫人年二十有二嫁楊州進士朱延之有子三人寅萬廣文五人尚幼夫人年四十有五卒於熙寧元年十一月之庚辰葬於某年某月之某甲子其墓在楊州天長之秦蘭里夫人為人柔閑靜專事父母盡子道事姑長興縣太君賈氏盡婦道事夫盡妻道為母及與內外屬人接一皆盡其道故其處也愛於其家其嫁也夫之屬人上下


遠近皆愛之而其歿也哭之者皆哀是不宜無銘而朱君余舅也屬余銘曰

媛維沈女經德以身柔嫕靜簡一作孚于屬人維祉在後有子誥誥琢詩告美愈遠彌新


壽安縣太君張氏墓誌銘

夫人姓張氏濟州鉅野人嫁為同郡尚書駕部員外郎贈開府儀同三司吏部尚書晁公諱遘之夫人而為贈太傅諱侗之子婦有子男四人曰宗曜進士曰宗恪光祿少卿曰宗愿真州軍事推官曰宗懿尚書司門員外郎女一人嫁進士桑况夫人初封清河縣

君累封清河壽安縣太君年八十有七卒於熙寧二
 年之十一月某甲子葬於某年之某月某甲子其墓
 在開封府祥符縣旌孝鄉合儀同之兆卒時子宗曜
 宗愿皆已死既而光祿居喪以疾亦死而諸孫男女
 凡三十人男多已仕女多已嫁矣夫人為人仁厚莊
 靜自為女及既嫁處內外親尊卑長幼親疎之際無
 不當於禮而恩稱之其長者皆以為善事我而平居
 為等夷及少者莫不頌以為婦也雖老未嘗懈而雖
 疾未嘗有惰容維其初終受養被封既壽而康實備
 成福可謂盛矣余之亡妻於夫人之孫女為第三而



光祿之長女也知夫人之行為尤詳故為之銘曰
 女婉張氏處躬以厚來嬪晁宗太傅維舅儀同維夫
 卿士維子有孫誥誥亦紹厥美累封備養維康以壽
 德則既成福亦多有納詩新藏尚告爾後



南豐文集

卷四十五

元豐類藁卷之四十五

十一

